

# Nagina indicaziun dals dretgs legals

Il parlament è cunter inditgar ils dretgs legals tar votaziuns

■ (anr/ac) **Il cussegl grond è suandà al parairi da la regenza e da la maioritad da la cumissiun è desista d'ina indicaziun dals dretgs legals en il carnet da votar. Dentant ha la revisiun parziala da la lescha dals dretgs politics en il chantun Grischun, tractada ier dal cussegl grond, scleri las cumpetenzas en in cas da recurs.**

Basegna il carnet da votar, repartgì avant mintga votaziun al singul votant, dad ina indicaziun dals dretgs legals? Avant dus onns era il cussegl grond anc da l'avis che quai saja necessari ed ha sustegnì ina intervenziun dal deputà *Bruno Tscholl* (pld Cuira). En la veglia da la regenza grischuna sco quai ch'il cusseglier guvernativ *Martin Jäger* ha accentuà avant il cussegl grond il mardi passà. Entaifer ils dus onns passads ha il cussegl dentant midà parairi e refusà d'amplificar l'artitgel 22 cun la pretensiun d'integrar en il carnet da votar ina indicaziun concernent ils dretgs legals per votantas e votants ch'èn da l'avis che las indicaziuns dal carnet sajan falladas. Il cussegl è suandà al parairi da la regenza e da la maioritad da la cumissiun cun 68 vers 37 vuschs. Per la maioritad da la cumissiun ha *Maurizio Michael* (pld Bregaglia) fatg valair che las indicaziuns dals dretgs legals vegnian communitgadas cun ils resultads da votaziun. Uschia saja ina ulteriura publicaziun en il carnet da

votar betg necessaria. Insumma pudessi ina publicaziun en quest carnet far l'impressiun che las indicaziuns dal carnet na sajan betg suffizientas. *Conradin Caviezel* (ps Cuira) ha pledà per la minoritad da la cumissiun è visà a l'incumbensa da la politica d'informar votantas e votants davart lur dretgs. L'indicaziun dals dretgs legals publicgads ensemen cun ils resultads da votaziun en il fegl uffical chantunal cuntanschi sulet ina pintga part dal suveran. Cusseglier guvernativ *Martin Jäger* ha menziunà che la regenza saja anc adina encunter l'indicaziun dals dretgs legals en il carnet da votar. Era perquai ch'il carnet da votar da la confederaziun na cuntagnia betg ina tala indicaziun ed era nagins carnets dals ulteriurs chantuns.

*Martin Jäger* ha tuttina accentuà l'imputanza da la revisiun da la lescha per ils dretgs politics. Numnadamain da definir cler las cumpetenzas per cas d'in recurs en connex cun il text dil carnet da votar. Avant trais onns è sa mussà che las cumpetenzas d'entrar en in recurs nun erian betg scleridas. Lu hai dà in recurs suenter la votaziun per il nov center amministrativ dal chantun. Quella part da la revisiun da la lescha per ils dretgs politica en il chantun Grischun n'è betg stada dubitaivla. Il cussegl grond ha acceptà la revisiun cun 95 vers ina vusch.